

Ispraćene dvije grupe hadžija iz Tuzle



Rano jutros, te danas popodne iz Tuzle su ispraćene dvije grupe hadžija. Hadžije su autobusima prevožene do džamije Kralj Fahd u Sarajevu, a onda dalje do Međunarodnog aerodroma Sarajevo, odakle je avionima planiran odlazak za Medinu.

“Aktivnosti u vezi s odlaskom naših hadžija na hadž tekle su na području muftijstva tuzlanskog prema planu i prema uputstvima Ureda za hadž Rijasetu Islamske zajednice u BiH. Danas svjedočimo najsvećnijem dijelu ovogodišnjeg programa koji se realizira na našem području”, izjavio je Muhamed Hasanspahić, sekretar muftijstva tuzlanskog.

S područja muftijstva tuzlanskog put Mekke ove godine odlazi 296 hadžija. Prije ispraćaja proučena je ikrar dova.

“Organizacija je jako kompleksna budući da se na području Saudijske Arabije nalazi nekoliko miliona hadžija. Ali, Islamska zajednica uradila je sve besprijekorno da olakša boravak i samo obavljanje svih obreda našim hadžijama”, kaže vodič Asmir Imamović.

Hadž je jedna od pet islamskih dužnosti, koju tokom života trebaju ispuniti svaki punoljetan muškarac i žena koji steknu uvjete za to. Dan Arefata je u subotu, 10. augusta. Deveti dan posljednjeg mjeseca hidžretskog kalendara poznat je pod nazivom Dan Arefata. Arefat je brežuljak udaljen od Mekke petnaestak kilometara, a boravak na Arefatu je obaveza svakoga hadžije, sastavni je dio obreda hadža, te se sve hadžije dan uoči Kurban-bajrama, okupe na ovom mjestu.

Kurban ili Hadži-bajram, tokom kojeg je potrebno zaklati kurban i podijeliti kurbansko meso siromasima, prijateljima i komšijama, traje četiri dana, a ove godine počinje u nedjelju, 11. augusta.

(fena, foto: ilustracija)

60

SHARES

[Share on Facebook](#)

- [Tweet](#)

- [Follow us](#)

- [Share](#)

- [Share](#)

- [Share](#)

- [Share](#)

- [Share](#)

Date: 31-07-2019